Nr. 9 • 07.05.2021



Aus dr Haamit

Habt'r dan 3. Arzgebirgskrimi aah ageguckt?

Iech hatt schu e ganze Zeit drauf gewartt, dosser entlich mol ze saah is. Lang sot hat's ja gedauert. Egal ham mir wieder dra gedacht, wie vunne Gahr die Filmleit e paar Wochn in dr Sose rimgelungert sei. Mehstns warn se ben Schnitzer drinne. Do war zegar emol de Stroß gesperrt gewasn. Iech hob schu egal men Spott gemacht un hob ieberlegt, wie viel Sekundn dos Schnitzstiebl ze saah sei werd. Nu ja, bei dr Stroßnsperr hattn se schu ewing iebertriebn. Do dortn is suwiesu kaa rachtis Begängnis, do hättn die schu emol ne freie Stroß gehatt. Un dann is danne ihr Auto när aamol esu vorbeigehuscht. Nu, dos klaane Baargl ro, dos is ja aah när e Wimpernschlog. Aber is Schnitzerstiebl war schu lang ze saah, dos hätt iech gar net erwartt. Mr hätt siech zegar ewos aussuchn kenne, suviel hot mr gesaah. När dos e annrer Schnitzer drinne war. Aber dos war ja ze erwartn, schließlich is unner Schnitzer kaa Schauspieler. Un dar Schau-

spieler, dar ne gemimt hot, war aah allis, när kaa Schnitzer. Iech waß gar net, ob dar noch alle Finger dra hot. Aamol is ja zegar ewing Blut geflossn. Aber dos war schu in Ordnung, aah dos unner Schnitzstiebl of aamol annerscht gehaasn hot. Aber gewunnert hob iech mich, wu dann Aaner aus dan Schnitzstiebl raus is, un üm de Eck nimm, also nei'n Grundwag. Un of aamol war dar an ne Außnbereich vun ner Kneip. Erscht wollt iech die "Streck" ja emol olaafn, aber dann stands in dr Zeitung, doss die Kneip in Alberud wär. Nu, do bie iech drham gebliebn! Toll war aah, wie unner Arzgebirg drwaagn su eng zammwächst! Gespielt hot die Geschicht eigntlich in Hartnstaa, aber üm de Eck nimm war glei Charmntz, Alberud, Sose un wos aah immer. Do kenntn zegar de Fußlahme emol e Arzgebirgswanderung unnernaamme!

De Filmleit ham drwaagn allerhand behannlt, vun Feier machn im Wald, bis zun "Wildpinkln" un aah e Eiswogn war ze saah, leider net dar vun Richter Cafe.

Die Leit ausn Arzgebirgskrimi ham uns zegar e Vorbild gabn. Se ham alle mit "Glück auf" gegrießt. Is hot zwar ewing annerscht geklunge, mir quetschn dos ewing annerscht raus; aber wos solls. Bei uns hot siech is "Hallo" e bissl ze sehr braat gemacht, aber öb mir dos wieder zerickdrehe kenne, waß iech aah net. Missn mirs halt mol versuchn.

Aber sinst war dr Krimi ganz ok, net ze blurinstig, aah wenns zwee Leichn gob, die Aane war ja schu 30Gahr alt! Un vor alln kunnt mr dos aguckn, uhne ne Erklärung ze lasn. Bei mannign Krimis, die itzte erscht gedreht wurn sei, brauch mr dos mitunner. Also die Leit kenne mit meiner Erlaubnis wetterdrehe, aah wenn iech gar nischt ze sogn hob.

Renate Georgi

Mir vorstenne de Walt ball nimmer!

- Fortbildung im Erzgebirgischen Heimatverein Eibenstock -

Andauernd wern mir mit neie daamische englingsche Vukabln belästicht, des nimmt dermosn ieberhand, des mor zen Schluss gar nischt meh vorstieht. Desserwagn gibt's heit ausn Eimstocker - Arzgebirgs – Lexikon - Dudn in klenn Lehrgang. Zwar net ieber su ne

Vidjo-Konforenz, wies de Grußn vürmachn, mir namme abn dodorzu unner monatlichs Blattl in 3 Stundnoschnittle. War alle drei Stundn durchhält un siech allis gut merkt, kaa sugar noch sei arzgebirgsches Hilfs-Abi schaffen! Also lus giehts, frisch gelernt is halb ge-

wunne, oder wie des haaßt. Hier is eier Lehrer von dar neimodschn Hoomskuuling. Zen Vorständnis: erscht de englische, dann de arzgebirgdeitsche Schreibweis un noocherts de Bedeitung:

Hoomskuuling for unnere Senjorinne un Senjorn

Homeschooling	Hoomskuuling	Unnerricht dorham in Stiebel oder aa in dor Kich
Lockdown	Lokdaun	do fährt kaane Lok zen unnern Bahuf, des bedeit ne Ausgangssperr, do soll mor allis im Alltog schu eweng ganz schie eischränkn
Shutdown	Schattdaun	allis schließn, stillegn un runnerfahrn, is gieht gar nicht meh
Hotspot	Hottspott	do tun de Witschers net ebber ihre Pfaar vorspottn, na, des is e ganz schlimmer Brennpunkt, aber net in Ufn
Click & Collect	Klick un Kollekt	aussuchn un aaklickn wos mor kaafn will in Innernet mit dare Kompjutermaus un noocherts im Eikaafs- lodn ohuln
Podcast	Pottkaast	des is Gelaaber in Innernet, mannichsmol ewos wart, aber aa viel unnitzis Zeich, dodorfier kosts nischt
Shitstorm	Schittstorm	des haaßt fei werklich "Schei…" un dann noch "Sturm", lawinenartige ganz schlachte Kritik un ganz schlachte Redn ausn Innernet
Influencer	Influuenzer	des sei Latschweiber oder aa Latschmanner, die en dauernd ewos eiredn wölln, des mor wos kaafn oder ausprobiern söll, wos mor eingtlich gar net will im Soschlweb